

## Sente cörta tli San Pöblo oquemejcuelle

# EFESIOS

**1** Naja nePöblo, que neca netlateotlantle de Cristo Jesús, pues ejqueu quenequihuaya Deus. Nemiechejcuellea ini nönca cörta para nemejua tli nenyecteque, tli necate<sup>\*</sup>ipa Efeso, tli nemoneltoca tieca Cristo Jesús. <sup>2</sup>Deus toTajtzi hua Tlöcatzintle Jesucristo ma nemiechmomeyaaquelicö tieinfavur hua neyulsiebelestle.

### Deus tiechbendeseyumacaque ca noche bendeseyu por medio de Cristo

<sup>3</sup>Ma tetiteochihuacö yejuatzi öque iloac tieDeus hua tieTajtzi de toTlöcatzintle Jesucristo. Pos yejuatzi tiechbendeseyumacaque por medio de Cristo ca noche bendeseyu tli de elfecac, tli tiechmacalo yejuatzi Espíritu Sönto. <sup>4</sup>Cachto de cuöc oquetlölzejque tlöltecactle hua elfecac, yejuatzi otiechixpejpenque por medio de Cristo. Quenequihuaya ma teyecö teyecteque tieixpa, sin niontle tli amo cuale, hua ma tecpeacö meyac tlasojtelestle. <sup>5</sup>Desde inu tiempo ye otiechtzontejque

para tiechselilusquea para ma teyecö tetiepelhua de yejuatzi por medio de Jesucristo. Pues ejqueu quecualejtaque hua oquenejque. <sup>6</sup>Por inu Deus seme quepealo yectieniebelestle ipampa tiechmacaque tiebieve favur por medio de tieConietzi öque tietlasojtlalo. <sup>7</sup>Tieca tieConietzi tecpejpea nemöqueextelestle ipampa oquenuquejque tieyesojtzi cuöc omecoac. Nuyejque tieca yejuatzi tecpejpea tlapojpolfelestle de totlajtlacul, pues lalebes bieye tiefavur otiechmacaque. <sup>8</sup>Hua por tiemeyac favur tiechmacaque noche machestelestle hua yecnenebelestle. <sup>9</sup>Pues otiechmachestejque inu secreto de tlininu yaja tietlanequeles. Pos ejqueu quecualejtaque, hua ejqueu quedesedirojque para quechihualusquea por medio de Cristo. <sup>10</sup>Pos ejqueu queplaneörojque Deus, que cuöc ases itiempo yejuatzi quensietelisque noche sösantle tieca Cristo, noche tli onca ompa elfecac hua nuyejque tli onca

\* 1.1 Seque manuscritos de tli cachto omojueloque amo quepea inu tlajtulme: “ipa Efeso”.

pan tlöltecپactle. Ejqueu Cristo tlamandörusque ipa innochtie.

<sup>11</sup>Deus quechihualtilo noche sösantle ma mochihua san quiene yejuatzi queyecnenebelejque hua oquenejque. Hua yejuatzi oquedesedirojque otiechtzontejque para ma \*teyecö tetiehuöxcahua.

<sup>12</sup>Hua ejqueu oquechijque para que por tejua tli cachto tecpeaya nemöchealestle tieca Cristo, por tejua ma quepeacö yejuatzi yectieniebelestle ipampa tiechmacaque inu tiebeye favur.

<sup>13</sup>Hua nemejua nuyejque, cuöc nenquecaque inu mensöje tli ica melöhuac, tli yaja cuale tlamachestelestle de quiene cuale nemomöquextisque, cuöc nenquecajque hua nemoneltoque tieca Cristo, Deus nemiechseyörojque ca tieEspíritu ipampa nencate tieca Cristo. Inu Espíritu yejuatzi tiechmacaque quiename tiechprometierfejque.

<sup>14</sup>Hua yejuatzi Espíritu iloac sieñas de que tejua tohuöxcatisque de lo que tli Deus tiechmacasque. \*Pos yejuatzi quenmöquextisque tli tiehuöxcahua, para ma tetiechamöhuacö hua ma tetieyectieniehuacö.

#### **Deus ma nemiechmacacö macheestelestle**

<sup>15</sup>Por inu , desde cuöc onejcac de quiene nemoneltoca tieca toTlöcatzintle Jesús hua quiene

nenquentlasojtla noche tli yecteque, naja por nopörte <sup>16</sup>amo nosiebea de netietlasojcömamatelea Deus por nemejua. Seme nemiechelnömecteneme ipa notlötlatjiteles. <sup>17</sup>Netietlatjlanelea yejuatzi öque iloac Deus de toTlöcatzintle Jesucristo, hua iloac Tajtle tli quepealo tlaniextelestle, ma nemiechmacacö \*macheestelestle ipa nemoyulo hua ma nemiechmachesticö de lo que tli ijyönteca para cache cuale nentieixomatesque. <sup>18</sup>Ma quetlapucö nemoyulo para cuale nencasojojcömatesque cuale tlin inu yaja nemöchealestle tli tecpejpea ipampa otiechnutzque. Ma xecasojojcömatecö tli inu yaja sösantle bieye lalebes hua rico lalebes tli \*yejuatzi nehuöxcatiluc cuöc tiechselejque tonochtie tli ye teyecteque. <sup>19</sup>Nuyejque ma xecasojojcömatecö cuale tlin inu yaja tielalebes bieye checöhuales ica tli tiechpaliebilo tejua tli toneltoca. Pues tiechpaliebilo ca inu checöhualestle hua beletelestle lalebes bejbeye hua checacteque <sup>20</sup>inca tli nuyejque otieyulebitiluc Cristo de intzölö mimejque, hua tietyliluc ca tiemöyecmö ompa elfecac. <sup>21</sup>Otiemacuc lalebes meyac checöhualestle ipa noche cubiernos hua tlajtoönejme hua checöhualesme hua tlajtojcöyume, hua ipa innochtie tli motieniehua, amo solamente ipa ini nönca

\* <sup>1.11</sup> Cuale nuyejque motradusirus: "tohuöxcaticö de lo que tli tiechmacasque".

\* <sup>1.14</sup> Cuale nuyejque motradusirus: "hasta cuöc quemöquextisque noche tli tohuöxcatisque".

\* <sup>1.17</sup> Cuale nuyejque motradusirus: "tieEspíritu öque nemiechmacasque macheestelestle hua nemiechmachesticul".

\* <sup>1.18</sup> Cuale nuyejque motradusirus: "tohuöxcatisque tejua tli teyecteque".

tiempo tlöcamo nuyejque ipa inu tiempo tli yebitz.<sup>22</sup> Hua quesujetöröjque noche sösantle itzintla tieicxehua Cristo. Hua Deus tiechmacaque Cristo para tejua tli tecreyentes, para ma iloa quiename itzontecö cuierpo, pues tlamandöruro ipa noche sösantle.<sup>23</sup> Hua tejua tecate quiename tetiecuierto, hua teticaxiltea yejuatzi öque caxiltilo noche sösantle ca nobeyo.

#### Por tiefavur Deus tomöquextejque

**2** Hua oyeya nemejua nuyejque nenyeyyega quiename nemimimejque ipampa nentlajtlacojtaya hua nenquechihuaya tlin amo cuale. <sup>2</sup>Nennemeya ipa inu tlajtlacule, quiename nejneme gente de nönca tlöltecپactle. Pos ejqueu quenequeya inu espíritu amo cuale tli tlamandöroa ipa yejyecatl, hua quemanimöroa niecate tli amo tlajtlaneltoca. <sup>3</sup>Hua oyeya tonochtie tejua nuyejque tenemeya quiename yejua. Tecneltocaya lo que tli queliebiöya tonacayo. Tecchihuaya lo que tli quenequeya tonacayo hua topensamientos amo cuale. De porsi tecmeresieroöya tiecualöneles Deus ma topa betze, quiename quemeresiero ocseque. <sup>4</sup>Pero Deus lalebes bieye tietlöocolteles quepealo, hua tiechtlasojtlaque lalebes. <sup>5</sup>Hua por inu tiechyulebitejque tieca Cristo, pos teyeyyega quiename temimejque ipampa totlajtlacul. Pues por tiefavur tomöquextejque. <sup>6</sup>Hua tiechajcojque tieca Cristo Jesús, hua otiechtlölejque ompa elfecac

tieca Cristo. <sup>7</sup>Ejqueu oquechijque para que ejqueu ipa inu tiempos tli bitze cuale quedemoströrusque tielalebes bieye hua rico favur tli otiechchibelejque ca selec tlasojelestle por Cristo Jesús. <sup>8</sup>Pues por tiefavur nemomöquextejque por medio de nemoneltoqueles. Hua ini nönca amo yebitz de nemejua, cache ica tietlöocoleles Deus. <sup>9</sup>Amo yebitz por que tejua tecchihuaya canajyetla tlin cuale. Ejqueu noso abele öque mochamöhuas. <sup>10</sup>Pues tetietlachihual Deus tecate. Yejuatzi tiechchejchijque por Cristo Jesús para ma tecchihuacö sösantle tlin cuale, tli Deus ye oquepreparöröjque para ma tecchijtacö.

#### Tecpea siebelestle por Cristo

<sup>11</sup>Por inu, xequelnömequecö de quiene nenyeyyega nemejua tli amo nencate nenjoriojte. Pues joriojte monacayuteque yejua mismo de incuierpo, hua por inu mocuejcuitea Nacayutlatecme, hua nemiechcuitea nemejua Amo Nacayutlatecme. <sup>12</sup>Xequelnömequecö de que pa nieca tiempo nenyeyyega bejca de Cristo, hua nenyeyyega nenenstranjeros de inu nación de Israel, hua amo nenquepeaya pörte ca inu acuierdos tli Deus quenprometierfejque ca yejua. Amo nenquepeaya nemöchealestle, nimpor amo nenquepeaya deus ipan tlöltecپactle. <sup>13</sup>Pero öxö tieca Cristo Jesús, nemejua tli pa nieca tiempo bejca nenyeyyega, öxö ye nemopachojque por medio de tiemequeles de Cristo, hua ejqueu nenquepea pörte inca joriojte.

<sup>14</sup>Pues Cristo iloac toyecsiebeles. Pues amo oyeya acuierdo entre tejua tli tejoriojte hua nemejua tli amo nenjoriojte. Oyeya quiename tlö oyene sente tepöntle tli tiechnencuajteliöya. Pero Cristo ye quemöyajque tepöntle, hua ejqueu tiechsietelejque. <sup>15</sup>Pues por medio de tiemequeles de tiecuerpo oquexexetunque inu tli tiechchihualtiöya majcamo uye acuierdo entre tli jorijte hua tli amo jorijte, que yaja inu ley ca noche imandamientos hua ireglamentos. Yejuatzi oquexexetunque para que ejqueu de tli jorijte hua tli amo jorijte oquechijque sa sie cuierpo yancuec ca yejuatzi. De inu maniera oquechijque yeucsiebelestle.

<sup>16</sup>Hua de inu maniera nuyejque tiechsentlölejque tieca Deus, sea tejoriojte noso amo, pues ye tecate sa sie cuierpo. Pos amo oyeya acuierdo entre tejua hua Deus, cache oyeya cualönelestle. Pero icaca quiename tlö Cristo oquemectejque inu cualönelestle ipa tiecorujtzi.

<sup>17</sup>Hua yejuatzi hualiloac hua otlanunutzaluc de inu cuale tlamachestelestle de que onca yeucsiebelestle. Nemiechelfejque nemejua tli amo nenjoriojte, tli nenyeyeya bejca de yejuatzi. Nuyejque tiechelfejque tejua tli tejoriojte, tli amo tönto bejca teyeyeyea. <sup>18</sup>Porque por medio de yejuatzi tejua hua nemejua nuyejque cuale topachusque tieca Tajtle por sa sie yejuatzi Espíritu. <sup>19</sup>De manieras que ayecmo nencate nenenstranjeros, hua

ayecmo sa tiepal nenchajchönte, cache ye nencate nenciudadanos iguöl que noche yecteque, hua nencate de tiefamilia de Deus. <sup>20</sup>Nencate quiename sente cale tli quechejchihualuteca Deus. Nemoedificöröjtecate ipa inu cimiento que yaja omochejchi de inu tlayulepantejque hua tlateotitlanme. Hua mismo yejuatzi Cristo Jesús belejuatzi iloac inu tietetu de esquinero. <sup>21</sup>Por medio de yejuatzi noche tepöntle majcöcte hua mosietelea para mochijteca sente teopantle yectec para ca toTlöcatzintle. <sup>22</sup>Hua tieca yejuatzi nemejua ejqueu nemosietelea ca ocseque para nnyesque quiename sente cale cöne chöntihuas Deus por medio de tieEspíritu.

### Pöbло omoencargöro de quentlanunutzas tli amo jorijoje

**3** Por ini nönca arrasu, naja nePöbло notlajtlötajtea. Naja neca neprieso ipampa netlanunutz de Cristo Jesús ca nemejua tli amo nenjoriojte. <sup>2</sup>Pues beles ye nenquemajmate de tiefavur Deus tli niechencargörfejque para ma nemiechmaca nemejua. <sup>3</sup>Beles ye nenquemajmate que Deus niechejtetejque inu secreto. Pos de ini nönca ye nemiechejcuelle quiejquech tlajtulme, <sup>4</sup>hua cuöc nenquetlajtultisque cuale nemomacasque cuienta de que necasojömäte cuale inu secreto de Cristo. <sup>5</sup>Ipä ocseque tiempos Deus amo tlamachestiluc de inu secreto ca tlöca, pero öxö ye oquemejtetejque ca tietlateotitlanhua yecteque

hua ca inu tlayulepantejque. Oquemejtetejque por medio de tieEspíritu. <sup>6</sup>Hua inu secreto yaja ini nönca: que por medio de inu cuale tlamachestelestle nuyejque nemejua tli amo nenjoriojte ye nemohuöxcatisque de lo que tli quentocöroa mohuöxcatisque joriojte. Ye nennepeasque pörte ca yejua de lo que tli Deus queprometierojque por Cristo Jesús.

<sup>7</sup>Hua Deus niechchihualtejque ma netequete de netlanunutzas inu cuale tlamachestelestle. Necpea ini tequetl ipampa Deus por tiefavur oniechtlöocolejque ini tequetl, por tiemeyac checöhuales tli oquemoströrörojque notech. <sup>8</sup>Naja, que mienos necmeresieroa que innochtie ocseque yecteque, Deus niechmacaque ini nönca tiefavur: que ma nemiechmacheste ca nemejua tli amo nenjoriojte de ini cuale tlamachestelestle tli tiechelfea de inu ricojyutl tli hasta abele tecasojcömate tli tecpea tietech Cristo. <sup>9</sup>Nuyejque niechencargörfejque ma nequenmacheste noche tlöca quiene oquenejque quechihuasque Deus ca ini nönca mensöje. Pues yejuatzi, öque oquechejchijque noche sösantle, primiero oquenejque majcamo machea inu secreto por meyac xebel. <sup>10</sup>Yejuatzi oquenejque ejqueu para que öxö quenchihualtilo \*cubernadurte hua tlötlajtoönejme ompa elfecac

ma quixomatecö por medio de tejua quiene ica tiemachestelles que tequete de meyac manieras. <sup>11</sup>Ejqueu tequete confurme ca lo que tli Deus quededesirojque por toTlöcatzintle Cristo Jesús para ma iye semejcac. <sup>12</sup>Por medio de Cristo cuale topachusque tieca Deus ca meyac confiönsa, ipampa toneltoca tieca yejuatzi. <sup>13</sup>Por inu nemiechtlötlajtea amo xomodesanimörucö por lo que tli necsufrirojteca por nemejua. Cache cuale xomochamöhuacö de que necsufriroa por nemejua.

### Tietlasojeles Cristo

<sup>14</sup>Bieno pues, por ini nönca arrasu notlancuöquetza tieixtla Tajtle, <sup>15</sup>öque tietech moformöroa \*noche \*\*familias ompa elfecac hua ipan tlöltecactle. <sup>16</sup>Netietlajtlanelea que de tiericojyu lalebes bieye ma nemiechmacacö checöhualestle por tieEspíritu para ma xomochecöhuacö ipa nemoyulo. <sup>17</sup>Hua netietlajtlanelea ma chöntihua Cristo ipa nemoyulo por medio de nemoneltoqueles, para que nemonelhuayutisque hua nemocimientörusque ipa tlasojelestle. <sup>18</sup>Ejqueu ma cuale xebejbeletecö xecasojcömatecö nemejua hua noche ocseque yecteque, quiene bieye lalebes hua beyac hua patlöhüac hua tlacpac hua bejcatlanca ica tietlasojeles Cristo. <sup>19</sup>Ejqueu noso ma xecasojcömatecö tietlasojeles Cristo, que abele öque casojcömates,

\* 3.10 De mölas tlajtlajtojteca de tlajtönejme de öngeles cualteque hua amo cualteque.

\* 3.15 Cuale nuyejque motradusirus: "inu familia intiero".

\*\* 3.15 Cuale nuyejque motradusirus: "naciones". Griego "patria".

hua ejqueu nemoyulo ma tieme por completo ca noche lo que tli iloac Deus.

<sup>20</sup>Hua öxö, yejuatzi Deus iloac öque ca checöhualestle tequetihua totzölö. Hua ca inu checöhualestle cuale quechihuasque cache lalebes meyac de lo que tli tejua tetietlajtlanelea hua hasta cache de lo que tebejbelete tecpensörusque.

<sup>21</sup>Yejuatzi ma quepeacö yectieniebelestle por medio de tejua tli tecreyentes hua por medio de Cristo Jesús nochepa semejcac. Amén. Ma ejqueu iye.

#### Sasie tecate por tieEspíritu Deus

**4** Por inu, naja, öque neca neprieso por tiepampa Tlöcatzintle, nemiechtlötlajtea ma xomoportörucö quiename conbenierebe siendo que Deus onemiechnutzque para xeyecö ca yejuatzi. <sup>2</sup>Amo xomochamöhuacö, hua xomoportörucö cuale ca ocseque. Xecxicucö ca paciencia lo que tli giente nemiechchibelea. Xomopilicö paciencia entre nemejua, hua tlasojtelestle.

<sup>3</sup>Xecpeacö cueröro xecmalficö inu sietelestle tli ye nenquepea tieca tieEspíritu Deus por medio de inu yecsiebelestle tli nemiechsietelea. <sup>4</sup>Pues onca sa sie cuierpo, hua sa sietzi Espíritu, ejqueu quieme Deus onemiechnutzque para nenquepeasque sa sie nemöchealestle. <sup>5</sup>Sa sietzi Tlöcatzintle iloac, sa sie neltoquelestle, hua sa sie cuötiequelestle. <sup>6</sup>Hua iloac sa

sietzi öque iloac Deus hua Tajtle de tonochtie, öque tlamandöruro ipa tonochtie, hua tequetihua por medio de tonochtie, hua iloac ca tonochtie.

<sup>7</sup>Pero cara sente de tejua oquesele sente beletelestle segün quiene Cristo oquemacaque. <sup>8</sup>Por inu quejtoa:

Cuöc otlejcoac tlacpac,  
oquenbicaque meyactie  
priesoste ca yejuatzi,  
hua quenmacaque  
tietlöocolelesme ca tlöca.

<sup>9</sup>Hua ètli quejitusneque cuöc quejtoa que otlejcoac? Quejitusneque que nuyejque otemoac hasta \*tlölpä ipan tlöltecaptle. <sup>10</sup>Hua iloac sa sietzi yejuatzi öque otemoac hua öque nuyejque tlejcoac cache lalebes tlacpac que noche elfecac, para ma tlamandörucö ipa noche sösantle ca nobeyo.

<sup>11</sup>Hua yejuatzi oquenmacaque seque ma yecö tlateotitlanme, hua ocseque tlayulepanejque, hua ocseque tlanunutzaneme de inu cuale tlamachestelestle, hua ocseque tlaixutiöneme hua tlamachiöneme. <sup>12</sup>Ejqueu yejuatzi quenpreparörörojque tli yectequa para ma tlatequepanucö para yejuatzi, hua para ma mobepöhua tiecuierto de Cristo.

<sup>13</sup>Quenequihua ma mobepöhua hasta que tonochtie ma tecpeacö sa sie neltoquelestle hua asojcömamatelestle de tieConietzi. Ejqueu teyesque quiename cuöc öque ye ica tlöcatl, que quiename Cristo teyesque completos. <sup>14</sup>Hua

\* 4.9 Cuale nuyejque motradusirus: “itzintla tlöltecaptle”.

ayecmo ma teyecö quiename  
tepelantzetzi, que sa nima topatla  
de tli tecpensöroa hua tiechbica  
cualquier enseñönsa quiename tlö  
teyene tetlasole que cuöc yebitz  
yejyecatl quebica. Cuöc ejqueu  
tecate gente cuale tiechcajçayöhua  
por inmöñas, para ma tecsequirucö  
inu ojtle de cajcayöhuaquelestle.  
<sup>15</sup> Por inu, ma ayecmo teyecö ejqueu.  
Cache ma tequejtucö lo que tli  
melöhuac, ca tlasojtelestle. Ejqueu  
ma tobepöjtacö de noche manieras  
para teyesque quiename Cristo.  
Yejuatzi iloac quiename itzontecö  
cuierpo. <sup>16</sup>Hua por yejuatzi noche  
cuierpo yecchechijteca hua  
majase \*por medio de lo que tli  
quetiemaca cara sesen pörte de inu  
cuierpo. Hua cara pörte de cuierpo  
tequete quiename conbenierebe,  
para que ejqueu noche cuierpo  
mobepöhua hua chajchamöbe ca  
tlasojtelestle.

### **Yancuec nemelestle tieca Cristo**

<sup>17</sup> Ini nönca noso nemiechelfea  
hua nemiechtajtulmaca por  
toTlöcatzintle, que ma ayecmo  
xenemecö quiename niecate tli  
amo tieixomate Deus, tli yejua  
neme ca inpensamientos tli amo  
bajbalierebe. <sup>18</sup>Abele cajasojcömäte,  
hua nencuaxelobjecate de inu  
nemelestle tli quetiemacalo  
Deus. Ejqueu cajcate ipampa  
amo quemajmate, hua ipampa  
oquetepitzojoque inyulo. <sup>19</sup>Ayecmo  
pejinöhua, hua por inu ye  
modedicörjoque ica bisio hua

tlajtlacule. Ejqueu quechihua  
sösantle petzoyutl hua moxicoa  
lalebes por sösantle tli amo  
inhuöxca. <sup>20</sup>Pero nemejua amo  
ejqueyi nenquetzecojque de  
Cristo, <sup>21</sup>tlö cana melöhuac  
nentiecajque yejuatzi hua tlö  
melöhuac nemomachtejque de  
yejuatzi, quiename ica melöhuac  
lo que tli oquejetojque Jesús.  
<sup>22</sup> Cache nenquetzecojque para  
nenquecöhusaque inu maniera  
de nemonemeles tli oyega  
nenquesequiroöya, inu nemelestle  
soltec tli ixniempolejteca, hua  
mocajçayöhua por itlaeliebeles tli  
amo cuale. <sup>23</sup>Hua nenquetzecojque  
para nemoyancuelisque de  
nemoyulo hua nemopensamientos,  
<sup>24</sup>hua nemöquisque inu yancuec  
nemelestle tli icaca quiename  
tienemeles Deus, que de melöhuac  
ica yectec hua melactec.

<sup>25</sup> Por inu, xejcöhuacö de  
nenestlacatesque, hua cache cuale  
xequejtucö lo que tli melöhuac  
entre nemejua, porque tonochtie  
tecate pörtes de sa sie cuierpo.

<sup>26</sup> \*Xecualöneçö hua amo  
xetlajtlacucö. Amo xejcöhuacö ma  
tlame tunale mientras oc turavea  
nentlajtlabielmecteneme. <sup>27</sup>Hua  
amo xecmacacö locör Diöblo.

<sup>28</sup> Öque tlachtequeya ma ayecmo  
tlachteque. Cache cuale ma  
quechihua cuale tequetl ca imöhua,  
para quepeas tli quetiemacas ca  
niecate tli quenpoloa.

<sup>29</sup> Amo xetlajtucö ca  
petzotlajtulme, tlöcamo cache

\* 4.16 Cuale nuyejque motradusirus: “porque cada sesen pörte de inu cuierpo quequextea proviecho de tieitech yejuatzi”.

\* 4.26 Xomojtele Salmos 4.4.

xetlajtlajtucö ca tlajtulme cuajcuale tli cuale betze cuöc monesesítöra, tli quenbepöhusque hua quentiemacasque proviecho para niecate tli quecaque. <sup>30</sup>Hua amo xetiechihualticö ma neyulcocolo tieEspíritu Sönto de Deus, öque tieca yejuatzi Espíritu Deus onemiechseyörojque hasta inu tunale cuöc tomöquextisque por completo.

<sup>31</sup>Xecxelucö de nemejua noche tlajyelejtelestle hua tlabielmequelestle hua cualönelestle hua tlabieltzajtzelestle hua tlabejbicaltelestle, hua noche ocseque sösantle amo cuale. <sup>32</sup>Cache xeyecö nencualtientlöca entre nemejua, hua xeyecö neyulcaxönque. Hua xomoperdonörucö entre nemejua, ejqueu quiename Deus nemiechperdonörojque nemejua por Cristo.

### Xecchihuacö quiename Deus quechihualo

**5** De inu maniera, xecchihuacö quiename Deus quechihualo, pues nentiepelhua nencate, hua nemiechtlaosjtalo. <sup>2</sup>Hua xenemecö ca tlaosjtelestle, ejqueu quiename Cristo tiechtlasojtlaque hua nemöctiluc por topampa. Pos yejuatzi iloaya quiename sente bentle hua cuetlabiltelestle tli ajfeyoc ijnecueste para ca Deus.

<sup>3</sup>Pero inu tlajtlacule ica sohuame tli amo nemosojsohuahua, hua noche sösantle petzoyutl hua tlaeliebelestle de lo que amo nemohuöxa, ni siquiera amo xectieniehuacö inu sösantle

entre nemejua, pues amo nemiechconbenieroa ipampa nenyechteque nencate. <sup>4</sup>Nimpor amo xequetjucö tlajtulme tli tiepinöjtea, nimpor tlajtulme tuntojte, nimpor tlajtulme de chönsa tli amo cualteque. Pos niecate sösantle amo conbenierebe, cache conbenierebe ma tetietlasojcömatalicö Deus.

<sup>5</sup>Pos ye nenquemajmate que tlö canajyeca mopöctea ca sohuatl tli amo isohua, noso tlö quechihua sösantle petzoyutl, noso tlö queliebea lo que tli ihuöxcia ocsente hua ejqueu mochihua quiename niecate tli quenteochihua ixniehualojme, ye nenquemajmate que yaja amo quepeas pörte cöne tlajtlamandöruro Cristo hua Deus. <sup>6</sup>Majcamo yeca nemiechcrajcayöhua, cache xecmatecö que por ipampa niecate sösantle yebitz tiecualöneles Deus impa niecate tli amo tlajtlaneltoaca. <sup>7</sup>Por inu nemejua amo xecpeacö pörte ca yejua.

<sup>8</sup>Pues oyeya nenyejyeya quiename nentlajtlayohuaquelestle ipampa nentlajtlacoöya, pero öxö ye nencate nentlöbile tieca toTlöcatzintle. Xenentacö noso ipa sosantle de tlöbile. <sup>9</sup>Porque inu tlöbile quebicatz lo que tlin cuale hua yectec hua melöhuac. <sup>10</sup>Xecprocurörucö xectzecucö tlin inu quecualejtalo Tlöcatzintle. <sup>11</sup>Hua amo xecpeacö pörte ca inu tlachihuale de tlajtlayohuaquelestle tli amo tli quebicatz. Cache cuale xejquexticö inu tlachihuale ca tlöbile. <sup>12</sup>Pos tiepinöjte mös öque sa tlajtlajtus de inu sösantle tli yejua quechihua sa ichtacajtzi. <sup>13</sup>Pero cuöc öque quequextea canajyetla

ca tlóbile niese cuale, hua lo que tli niese cuale motlöbelea. <sup>14</sup>Por inu quejtoa:

Xetlachea, taja que tecochteca, xemiehua de intzölö mimejque, hua metztlöbelisque Cristo.

<sup>15</sup>Por inu noso, xequejtacö cuale nemonemeles quiename nengiente nentlajmatque. <sup>16</sup>Xecaprovechörucö cuale nemotiempo, porque ye tecate pa tunalte petzoteque.

<sup>17</sup>Por inu, amo xeyecö xetuntojte, cache xecasojcömamatecö tlin inu tietlanequeles Tlöcatzintle. <sup>18</sup>Hua amo xetlöhuönacö ca mescöl, porque inu nemiechiempoloa. Cache xomotiemiticö ca tieEspíritu Deus. <sup>19</sup>Xomonunutzacö entre nemejua ca salmos hua himnos hua cuicatelesme de tieEspíritu Deus, hua xecuicacö hua xetiecuicaticö Tlöcatzintle ipa nemoyulo.

<sup>20</sup>Seme xetietlasojcömatalicö Deus toTajtzi por noche sösantle tietucöyupantzinco toTlöcatzintle Jesucristo. <sup>21</sup>Xomosujetörucö entre nemejua porque nentiembalea Cristo.

### Quiene ma tenemecö ipa tochö

<sup>22</sup>Sohuame, xomosujetörucö ca nemonajnömecua, quiename tlö oyene nemoTlöcatzintle. <sup>23</sup>Pos tlöcatl ica quiename itzontecö de isohua, ejqueu quiename Cristo iloac itzontecö de inu cuiero tli tecate tejua tonochtie tli tecreyentes. Pues yejuatzi iloac tlamöquextiöne de inu cuiero. <sup>24</sup>Hua quiename tejua

tli tecreyentes tiechtocöra tosujetörusque tieca Cristo, ejqueu nuyejque sohuame ma mosujetörucö ca innajnömecua ipa noche sösantle.

<sup>25</sup>Tlöca, xequentlasojojtlacö nemosojsohuöhuö, quiename Cristo tiechtlaasojtlaluc tejua tli tecreyentes, hua nemöctiluc por topampa. <sup>26</sup>Pues nemöctiluc para tiechyectelejque hua tiechchepöjque de toyulo, pues tiechchepöjque \*ca tietlajtultzi quiename öque tlachepöhua ca ötzintle. <sup>27</sup>Ejqueu oquechijque para tiechpresentörusque tieca yejuatzi mismo ca meyac tlaniexteble, sin niontle möncha nimpor niontle xoxolochtec, nimpor niontle sösantle amo cuale, tlöcamo teyesque intiero teyecteque.

<sup>28</sup>Ejqueu noso conbenierebe que tlöca ma quentlasojojtlacö insojsohuöhuö \*quiename quetlasojojtlal inpropio cuiero. Pues öque quetlasojojtlal isohua motlasojojtlal yaja mismo. <sup>29</sup>Pues ayec yeca quetlajyelejta icuierpo, cache quetlacualtea hua quemalfea.

Hua Cristo ejqueu quechihualo ca tejua tli tecreyentes, <sup>30</sup>porque tejua tecate pörtes de tiecuiero.

<sup>31</sup>Yaja ica: “Por ini nönca arasu tlöcatl quecöhucas itajtzi hua inöntzi, hua mosietelis ca isohua, hua yejua innehua yesque sa sie cuiero”. <sup>32</sup>Ini nönca ica sente secreto lalebes bieye, pero nequejotjeca que tratörebe de Cristo hua tonochtie tli tecreyentes.

\* 5.26 Cuale nuyejque motradusirus: “ca ötzintle (de tlacuötiequelestle) hua ca totlajtul (de testimonio)”, noso “ca inu tlajtulme de tlacuötiequelestle”.

\* 5.28 Cuale nuyejque motradusirus: “pues isohua icaca quiename ipropio cuiero de tlöcatl”.

**33** Pero cara sente de nemejua xectlasojtlacö nemosohua quiename nemotlasojtla nemejua mismo. Hua sohuame ma quenmabelicö innajnömcua.

**6** Nemejua tli nencate neminpelhua, xequenneltocacö nemotötajua porque nencate tieca toTlöcatzintle. Pues icaca cuale ma xecchihuacö ejqueu. **2** Pues ejqueu nemiechelfea inu primero mandamiento tli quebicatz sente promesa. Pues quejtoa:

Pa xequemejta motajtzi hua monöntzi,

**3** para que mopa huölös cuale sösantle, hua tenemes meyac xebetl ipan tlöltecactle.

**4** Hua nemejua nentötajte, amo sa xequentlabielmecticö nemopelhua, cache xequenbepöhüacö hua xequencastecörucö cuöc amo cuale quechihua hua xequentlajtulmacacö quiename conbenierebe porque tecate tieca Tlöcatzintle.

**5** Nemejua tli nenesclavos nencate, xetlaneltocacö ca \*nemopatrones necö ipan tlöltecactle. Xequenneltocacö ca mabelestle hua respieto, hua xecchihuacö ca noche nemoyulo, quiename tlö nenquechihua para Cristo. **6** Amo solamente xetequetcö cuöc yejua nemiechejta, quiename quechihua seque, tli solamente queneque mocöhusque cuale ca gente. Cache xetequetcö quiename nentieesclavos de Cristo, tli nenquechijtecate tieltlanequeles Deus ca noche

nemoyulo. **7** Xetlatequepanucö ca gönas quiename tlö para \*Tlöcatzintle hua amo para tlöca. **8** Xequelnömequecö que cara tlöcatl, cox esclavo noso cox libre, \*Tlöcatzintle quecuepelisque por tli quechihua.

**9** Nemejua tli \*nenpatrones nencate, ejqueu mismo nuyejque xequenchibelicö nemoesclavos. Ayecmo xequenmajmajcömecticö. Xequelnömequecö que ompa elfecac iloac yejuatzi öque iloac \*Patrón de yejua quiename de nemejua nuyejque. Hua yejuatzi amo tlachecuajejtal. **19** "Xectlölicö noche inu tlaquentle de guerra tli Deus tiechmacalo" (v.11)

### Itlaquie de guerra de sente creyente

**10** Hua öxö, nocnihua, xomochechöhuacö tieca Tlöcatzintle, ca tiechecöhuales de yejuatzi, tli lalebes checactec ica. **11** Xectlölicö noche inu tlaquentle de guerra tli Deus tiechmacalo. Ejqueu cuale nenquexicusque ipetzomöñas Diöblo. **12** Pos amo tomaga ca gente tli quepejpea yestle hua nacatl quiename tejua, cache tomaga ca niecate cubernadurte hua tlajtoönejme tli tlamandöroa ipa noche tlöltecactle ca tlajtlayohuaquelestle, ca inu espíritus amo cualteque tli cate ompa tlacpac. **13** Por inu xejcönacö noche inu tlaquentle de guerra tli Deus tiechmacalo, para que cuale nenquexicusque cuöc ases amo cuale tunale, hua cuöc ye nenquechijque

\* 6.5, 7, 8, 9 Sa sie tlajtule ca griego quejtosneque "tlöcatzintle", hua nuyejque "patrón".

noche, nemocöhuasque firmes.

<sup>14</sup>Xechecöjtacö, pues, hua xomotlajcoilpetacö ca lo que tli melöhuac ica, pues yaja inu nemocinturón iyes. Hua xectlölöcö yectelestle quiename nemotlaquie de tepostle tli nemiechprotejierus de nemopiecho.

<sup>15</sup>Hua xeyecö nenlistos por medio de inu cuale tlamachestelestle de yeckiebelestle, pues yaja inu icaca nemosapötoshua. <sup>16</sup>Hua ipa noche sösantle xecönacö inu escudo que icaca yaja nemoneltoqueles. Pues ca inu cuale nenquensiebisque inu fliechas tli xutlatebitze, inu sösantle amo cuale tli quentitlane Amo Cuale Tlöcatl. <sup>17</sup>Hua xemöquicö inu cöscö de tepostle, que yaja nemomöquextelis. Hua xejcönacö inu espöda tli tiechmacalo yejuatzzi

Espíritu, que yaja tietlajtultzi Deus. <sup>18</sup>Xecchihuacö noche ini nönca ica netlötlajtelestle, hua seme xomotlajtlötlajticö hua xetietlajtlanelicö Deus por medio de tieEspíritu. Para ini nönca, xetlachixtacö hua xecsequirojtacö xetietlajtlanelejtacö por noche

yecteque. <sup>19</sup>Hua xetietlajtlanelicö por naja, para ma niechmacacö tlajtule para ma netlanunutra ca balur de inu secreto que yaja inu cuale tlamachestelestle. <sup>20</sup>Por ipampa inu cuale tlamachestelestle neca nerepresentönte de Deus necö cöne nelpeteca ijtec cörsel. Xetlajtlanecö para ma netlanunutra ca balur, pos ejqueu conbenierebe.

### Tlajpalulestle

<sup>21</sup>Tíquico, totlasojcöicni öque yectlatequepanoa por Tlöcatzintle, yaja nemiechmachebris cuale de noche tli necchihua para que nenquematesque quiene neca. <sup>22</sup>Por inu mismo nectitlane ca nemejua, para ma xecmatecö quiene tecate, hua para ma nemiechanimöro.

<sup>23</sup>Innochtie tocnihua ma quepeacö yulsiebelestle hua tlasojtelestle ca neltoquelestle, de Deus toTajtzi hua Tlöcatzintle Jesucristo. <sup>24</sup>Ma quepeacö tiefavur innochtie tli tietlasojtla toTlöcatzintle Jesucristo ca tlasojtelestle tli ayec mopatla.